



Na osnovu člana 32. Zakona o materijalnoj podršci porodicama sa djecom u Federaciji Bosne i Hercegovine ("Službene novine Federacije BiH", br. 52/2022) i člana 122. Zakona o socijalnoj zaštiti, zaštiti civilnih žrtava rata i zaštiti porodica sa djecom ("Službeni glasnik Unsko-sanskog kantona" br.5/00, 7/01, 11/14, 23/18, 15/20 i 10/23) kantonalni ministar zdravstva, rada i socijalne politike donosi

PROGRAM OBILJEŽAVANJA "DJEČIJE NEDJELJE" NA PODRUČJU UNSKO-SANSKOG KANTONA ZA 2023. GODINU

I. PREDMET I SVRHA PROGRAMA

U cilju podsticanja i organizovanja kulturno-obrazovnih, rekreativnih i drugih mjera i akcija usmjerenih na razvoj i unapređenje brige o djeci, na području Unsko-sanskog kantona (u daljem tekstu: Kanton) će se povodom "Dječije nedjelje" organizovati raznovrsne aktivnosti od strane predškolskih i školskih ustanova, kulturnih institucija, socijalnih i zdravstvenih ustanova i udruženja koje u svom radu pokreću nove inicijative i programe od koristi za djecu.

II. PERIOD OBILJEŽAVANJA "DJEČIJE NEDJELJE"

U 2023. godini "Dječija nedjelja" će se obilježiti u periodu od 02. do 06. oktobra 2023. godine.

III. PROGRAMSKE AKTIVNOSTI

Obilježavanje "Dječije nedjelje" na području Kantona za 2023. godinu realizovat će se kroz sljedeće programske aktivnosti:

III. 1. Organizovanje manifestacije

U skladu sa iskazanim interesom i ranijim relevantnim doprinosom ovoj aktivnosti i manifestaciji u cjelini, "Dječija nedjelja" za 2023. godinu će na području Kantona biti obilježena aktivnostima u Centru za razvoj inkluzivne prakse Bihać (u sastavu JU OŠ „Harmani II“ Bihać), Centru za razvoj inkluzivne prakse Cazin (u sastavu JU OŠ „Cazin II“ Cazin) te u JU Socijalno pedagoška životna zajednica Bihać. Navedene ustanove će donijeti svoje detaljne planove aktivnosti za obilježavanje „Dječije nedjelje“.

Nositelji aktivnosti: Ministarstvo zdravstva, rada i socijalne politike USK, Centar za razvoj inkluzivne prakse Bihać (u sastavu JU OŠ „Harmani II“ Bihać), Centar za razvoj inkluzivne prakse Cazin (u sastavu JU OŠ „Cazin II“ Cazin), JU Socijalno pedagoška životna zajednica Bihać.

III. 2. Dodjela sredstava prikupljenih povodom obilježavanja Dječije nedjelje

Članom 33. Zakona o materijalnoj podršci porodicama sa djecom u Federaciji Bosne i Hercegovine, propisane su vrste djelatnosti za koje pravna i fizička lica koja se njima bave, povodom obilježavanja „Dječije nedjelje“ imaju obavezu da tokom mjeseca oktobra naplaćuju dodatni iznos od 1% na utvrđene usluge/proizvode, a na taj način naplaćeni dodatni iznos su dužni uplatiti na budžet kantona u roku od 15 dana po isteku mjeseca oktobra.

Članom 35. Zakona o materijalnoj podršci porodicama sa djecom u Federaciji Bosne i Hercegovine te članom 123. Zakona o socijalnoj zaštiti, zaštiti civilnih žrtava rata i zaštiti porodica sa djecom USK-a propisano je da nadležno ministarstvo uplaćena i osigurana sredstva u budžetu Kantona s pozicije "Dječija nedjelja", raspoređuje organizatorima manifestacija i akcija posvećenih djeci i unapređivanju razvoja društvene brige o djeci kao i za druge oblike zaštite o djeci utvrđene ovim zakonom.

Nositelji aktivnosti: Ministarstvo finansija USK, Ministarstvo zdravstva, rada i socijalne politike USK.

III. 3. Medijsko promoviranje obilježavanja "Dječije nedjelje"

U cilju upoznavanja šire društvene javnosti s obilježavanjem "Dječije nedjelje" na području Kantona u 2023. godini, Ministarstvo zdravstva, rada i socijalne politike USK će blagovremeno dostaviti medijskim kućama prikladno saopštenje za javnost. Planirane ustanove koje će svojim aktivnostima obilježiti "Dječiju nedjelju", također će poduzeti aktivnosti na medijskom promovisanju obilježavanja događaja na svom području.

Nositelji aktivnosti: Ministarstvo zdravstva, rada i socijalne politike USK, Centar za razvoj inkluzivne prakse Bihać (u sastavu JU OŠ „Harmani II“ Bihać), Centar za razvoj inkluzivne prakse Cazin (u sastavu JU OŠ „Cazin II“ Cazin), JU Socijalno pedagoška životna zajednica Bihać.

IV. ZAVRŠNE ODREDBE

Ovaj Program stupa na snagu danom donošenja i objavit će se na web-stranici Vlade Unsko-sanskog kantona.

Broj: 09-31-10001-1 /23
Datum: 28.09.2023. godine

